

Parcs svizzers, part 2: Alps e Svizra Meridiunala

■ En la segunda part da questa pit-schna seria davart ils parcs svizzers vegn dà in sguard als parcs natirals ch'èn situads en ils chantuns Vallais, Tessin e Grischun.

13) Parc natiral da Pfyng-Finges (VS)

Steppas e biotops, vitgs muntagnards e citadinas idillicas, vignas ed in dals guauds da tieus ils pli gronds da las Alps: En il Parc natiral da Pfyng-Finges sa preschenta la natira cun ina gronda diversitad en in spazi limità e surprinda cun cuntradas variadas ed ina flora e fauna remartgabla. Ina survista dat il Center Natira e Cuntrada a Salgesch. El infurmescha en pli davart rutas da viandar ed organisescha excursiuns guidadas cun botanichers, ornitologs e geologs.

Excursiun sin la senda da l'urs (6 km dad Unterems ad Oberems): Ina tschatta dal davos urs penda anc oz vi da la chasa communal dad Oberems. La senda da l'urs maina tras guauds fantastics ed aclaus originars e sur il grondius piogn da l'urs. Ultra da quai porscha ella bleras infurmaziuns sur da l'urs. Viadis spectaculars cun pendicularas cumpletteschan l'excursiun.

Center natira e cuntrada a Salgesch: Il center administrativ dal Parc natiral da Pfyng-Finges sa chatta en il center da Salgesch, 10 minutas a pe da la staziun. El dispona da locals da recezziun, da biblioteca e d'exposiziun sco era d'in shop cun products locals, cudeschs, brochuras d'infurmaziun e souvenirs.

14) Parc natiral da la Val da Binn (VS)

La Val da Binn surprinda cun mintga pass ch'ins fa. Questa val laterala dal Vallais è ritga da minerals ch'ins po chattar cun batter crappa en la chava da Lengenbach u durant ina tura cun chavacristals. I dat dentant anc bier auter da scuvrir: Il vitg intact dad Ernen sa revelescha era sco destinaziun gastronomica exquisita e sco lieu musical che permetta da giudair musica classica da cumponists renumads. A Grengiols flurescha il matg ina tulipana selvadia singulera en ils champs da seghel. Niederwald è il vitg natal dal retg dals hoteliers Cäsar Ritz.

Excursiun «Via romana» (11 km da Binn a Grengiols): L'excursiun entschaiava en il vitg da minerals da Binn e maina sin la via istorica tras la chavorgia selvadia e romantica a la chaplutta «Uff dum Blatt». Ella va vinavant sperasvi l'acclaus da Hockmatta a Bächerhische e fin al vitg da las tulipanas da Grengiols.

Il vitg musical: Ernen cun ses festival da clavazin e ses festival da musica barocca e da chombra è daventà enconuschent lunsch suror ils cunfins nazionals. Quest



Il Piz Ela dat il num al pli grond parc natiral da la Svizra.

FOTO PD

festival extraordinari da musica classica ha lieu mintga stad en ina cuntrada magnifica. El è vegni fundà sin iniziativa dal pianist bermier György Sebök.

15) Project Parc nazional dal Locarnese (TI)

Il Project Parc nazional dal Locarnese tanscha da las Inslas da Brissago fin a las tschimas da las Alps tessinaises cuvertas cun naiv. Questa regiun, nua che las plattas continentalas da l'Africa e da l'Europa sa scuntran, è plain cuntrasts: qua palmas ed ina vita pulsanta al lai, là ina natira selvadia cun vals solitarias, chavorgias furibundas, guauds spess e piz abrupts. Tranteren aclaus idillics cun vegliandras chasas da crap, baselgias e chapluttas che dattan perditga d'ina cultura alpina antruras fitg viva.

Sin veglias sendas dad Intragna en la Val Onsernone (6 km da Loco ad Intragna): La «Via della Vose» pittoresca colli il vitget d'Intragna cun Loco. Sin questa vegliandra senda da sauma purtavan a ses temp ils Onsernonesi lur rauba sin ils martgads da Locarno ad Ascona, da l'autra vart chatschavan ils purs da Losone e dal Centovalli lur muvel sin las alps da la Val Onsernone. Il punct culminant da questa ruta è las giassas stretgas ed entreschadas ad Intragna, la chavorgia selvadia da l'Isorno e las terrassadas da Loco da 25 kilometers lunghezza.

Excursiun a Bordei en il Centovalli (10 km dad Intragna a Rasa): La spassegiada maina tras in gaud da chastognas

fitg romantic e suonda ina veglia senda da sauma fin al Ponte Romano, la pli veglia punt da crap artgada da la val. Stgalas en il grip mainan vinavant a Rasa ed a Bordei, ad in dals pli bels vitgs tessinaises restaurà a moda exemplarica da la Fundaziun Terra Vecchia. Per questa spassegiada ston ins avair in pass ferm e segir ed ina buna cundiziun.

16) Parc natiral Bavregn (GR)

Trais vals, duas culturas, in parc: enconuschent per chavorgias profundas, vitgs intacts, lais da muntogna clers sco cristals e capricorns. Ils animals imposants e maiestus vivan en las parais-crap dal Piz Bavregn (2998 m) e veglian sur il Parc natiral Bavregn cun sia cuntrada selvadia e natirala che evochescha l'eternitad sin 373 kilometers quadrats.

Excursiun «Vieia Traversina» (12 km da Tusaun a Ziràn): L'emprima etappa da quest lung traject cultural numnà «Via Spluga» maina il viandant da Tusaun al complex fortifitgà da Reziòlta, da là vinavant sur la spectaculara punt da lain suspendida, numnada piogn da Traversina, en la Viamala ed a la Punt da Suransuns, construida cun sugas d'atschal stendidas, e vinavant a Ziràn.

Baselgia da S. Martin, Ziràn: Il palantschieu sura romanica da la baselgia da S. Martin cun sias picturas da bellezza è enconuschent sin l'entir mund. La baselgia è documentada per l'emprima giada l'onn 831 sco «ecclesia plebeia», il lieu Ziràn il medem onn sco «Ciranese». Chats

da munaida cumprovan che la baselgia existiva gia dal temp roman. In'expoziun permanenta a la Piazza da la Posta preschenta l'istorgia da la baselgia.

17) Parc Ela (GR)

In spectacul natiral sin 548 kilometers quadrats – il Parc Ela en la Val d'Alvra ed en il Surses è il pli grond parc natiral da la Svizra. Palids, prads sitgs, lais da muntogna e guauds spetgan da vegnir scuverts. Situà tranter ils pass alpines istoricain impurtants da l'Alvra, dal Güglia e dal Set, dispona il Parc Ela da blers bains culturals, da fortezzas imposantas e da 19 vitgs ch'han mantegnì lur scharm originar. E cun la lingia da l'Alvra e dal Bernina da la Viafier retica dispona el ultra da quai d'in Patrimoni mundial da l'Unesco ch'ins na po betg mo explorar cun l'auto, mabain era a pe.

Tura d'exploraziun (11,4 km da l'ospizi dal Güglia / La Veduta a Beiva): L'excursiun «Dal continent a l'ocean» dal Parc Ela permetta al viandant da scuvrir fastiz dal passà. Ins scuvra qua tranter auter veglias roderas da chars en il grip sco era relicts da la mar ed ins po ammirar l'imposant portal celest en la Val d'Agnel. Cun mintga pass suonda il viandant l'istorgia da nosa terra.

Museum da la Viafier da l'Alvra a Brauvogn: La lingia da l'Alvra da la Viafier retica è vegnida avarta il 1903 e distinguida il 2008 sco Patrimoni mundial da l'Unesco. Sia construziun era per las relaziuns dal quel temp in project gigantesch, cumparegliabel cun quel odiern da la NEAT. En il Museum da la viafier da l'Alvra pon ils visitaders laschar reviver l'istorgia da la Viafier retica e si'influenza sin la vita da mintgadi da la gliueda da la regiun.

18) Parc nazional svizzer (GR)

En la scena da la protecciun da la natira europeica ha il Parc Nazional Svizzer gè in'absoluta rolla da pionier. El è vegni fundà il 1914 sco emprim parc nazional da las Alps e posseda a medem temp il status da protecciun il pli aut dals territoris da cuntrada selvadia. Ultra dals animals e las plantas vegnan protegids er tut ils process natirals en il Parc. Ils 80 km sendas da viandar marcadas pussibilteschans als visitaders da scuvrir questa cuntrada fascinanta e sia dinamica al puls da la vita e senza disturbar il svilup natiral.

Excursiun sin il Margunet (8 km da Stabelchod al Pass dal Fuorn): La senda ecologica maina dals guauds dal Pass dal Fuorn a las pastgiras autalpinas cun ina ritga flora e fauna e cun in panorama magnific sur la mesadad dal Parc Nazional. Ultra da quai porscha ella infurmaziuns interessantas davart ils secrets,

averts e zuppads, sparpagliads per lung da l'itinerari.

Planira auta magica: La planira auta dals Lais da Macun è vegnida integrada pir l'onn 2000 sco davosa cuntrada en il Parc Nazional Svizzer. 23 lajets pli pitschens e pli gronds èn sparpagliads sco perlas stgiras sin quest plateau ch'ins cuntanscha en quatter uras da Lavin e da Zernez. L'attracziun da quest lieu è d'ina magia tut speziala che fa dad el in ulteriur punct culminant dal Parc Nazional. Dapi il 2010 furma il Parc Nazional Svizzer ensemen cun la Biosfera Val Müstair il reservat da biosfera da l'Unesco Val Müstair Parc Nazional.

Center dal Parc a Zernez: Il Center dal Parc ha translocà il 2008 en in edifiziu monolitico marcant da l'architect grischun Valerio Olgiati. El dispona d'ina tecnica absolutamain moderna che permetta al visitader da sfundrar en il mund miraculus dal Parc Nazional Svizzer, cun expoziuns permanentas, audioguids en 5 linguas, ina senda d'exploraziun per uffants, expoziuns temporaras stagiunals, ina butia ed in post d'infurmaziun. Il Center dal Parc è avert durant l'entir onn.

19) Biosfera Val Müstair (GR)

In mund per sai è la regiun idillica da la Val Müstair. Prada bella verda e vitgs pittorescs stattan en cuncontrast cun la natira selvadia dal Parc Nazional da l'autra vart dal Pass dal Fuorn. La cuntrada singulera è vegnida undrada gist duas giadas: La Val Müstair vala il medem mument sco parc natiral regiunal e sco part dal reservat da biosfera autalpin da l'Unesco Val Müstair – Parc Nazional Svizzer. Ina vista spezialmain bella sin il paradis da quietezza pon ins giudair sin la «Senda Val Müstair» che maina aut sur la val tras guauds da schembers, pastgiras alpinas e prads da flurs.




La charta uffiziala porscha infurmaziuns cumplexivas davart ils singuls parcs.

Senda Val Müstair (9 km dal Pass dal Fuorn a Lü): La via panoramica «Senda Val Müstair» maina dal Pass dal Fuorn al vitget da Lü. Durant la tura fitg variada pass'ins sperasvi il Lai da Juata idillic ed ins po contemplar las tschimas marcantas dal Piz Daint e dal Piz Dora sco era l'imposant massiv da l'Ortler.

A la riva dal Rom: Il lieu da partenza da l'excursiun tematica è la regiun da funtauna dal Rom sur Tschier. Da qua serpeggia la senda 14 kilometers lung il curs natiral dal Rom via Fuldera, Valchava, Sta. Maria fin a Müstair. Cuntradas fascinantas cun ognas misteriusas, guauds da lareschs, palids bassas grondusas e prads en flur enritgeschan la spassegiada sin questa via.

La preschentaaziun:
Dossier «Parcs svizzers».

Dapli infurmaziuns:
chatta.ch/?hiid=1676
www.chatta.ch



Ils parcs svizzers en survista.